



Broj: 01/6-50-1-32-22/05
Sarajevo, 5.12.2005. godine

Z A P I S N I K
22. sjednice Komisije za saobraćaj i komunikacije,
održane 5.12 2005. godine

Sjednica je održana 5.12.2005., s početkom u 14,20 sati.

Sjednici su prisustvovali članovi Komisije:

1. Miloš Jovanović, predsjedavajući
2. Ivo Lozančić
3. Nenad Mišić
4. Ruža Sopta
5. Izet Hadžić

Sjednici nisu prisustvovali: Milorad Živković, Muhamed Moranjkić, Selim Bešlagić i Adem Huskić.

U ime Vijeća ministara BiH, sjednici su prisustvovali: Branko Dokić, ministar komunikacija i prometa BiH, Željko Knežević, pomoćnik ministra komunikacija i prometa BiH, Željko Brstilo i Timur Gadžo, službenici Ministarstva komunikacija i prometa BiH, i Biljana Trivunović, savjetnik u Ministarstvu vanjske trgovine BiH.

Sjednici je prisustvovao i privremeni sekretar Komisije Ahmed Jalovičić.

Predsjedavajući Miloš Jovanović predložio je sljedeći

D N E V N I R E D

1. Verificiranje Zapisnika 21. sjednice, održane 15.9.2005.godine,
2. Prijedlog zakona o Agenciji za informaciono društvo Bosne i Hercegovine, predlagač: Vijeće ministara BiH,
3. Zahtjev Upravnog odbora Nezavisnog operatera sistema za prijenosni sistem u BiH za tumačenje člana 47. Zakona o osnivanju Nezavisnog operatera sistema za prijenosni sistem u BiH,
4. Ostala pitanja.

Dnevni red jednoglasno je prihvaćen.

Ad. 1.

Na Prijedlog zapisnika nije bilo primjedbi, te je Komisija jednoglasno verificirala Zapisnik 21. sjednice.

Ad. 2.

Predsjedavajući je podsjetio prisutne da je na 21. sjednici Komisije usvojen zaključak o produženju roka komisijske faze za Prijedlog zakona o Agenciji za informaciono društvo Bosne i Hercegovine, kao i zaključak da se Ministarstvo komunikacija i prometa izjasni o uložnim amandanima i da je Ministarstvo dostavilo Komisiji traženo mišljenje o amandmanima, nakon čega je otvorio raspravu o principima Prijedloga zakona.

Željko Brstilo je, u ime predlagača Zakona, istakao da je 2004. godine predsjedavajući Vijeća ministara BiH osnovao radnu grupu za izradu Zakona i da je koncept Zakona zasnovan na tri principa: zakonitosti, transparentnosti i tajnosti. Dalje je ukazao na činjenicu da CIPS ima dobru osnovu i kadrovsku i tehničku, ali da je već na sjednicama radne grupe došlo da različitih stavova o tome da li CIPS treba biti u okviru Agencije. Što se tiče amandmana poslanika Novakovića kojim se briše član 28. i čime se iz Agencije isključuje CIPS, smatra da je obrazloženje dosta dobro. U vezi s amandmanom o Vijeću Agencije, Brstilo smatra da je korisno i dobro definirano, ta smatra da se Agencija ne bi smjela baviti sigurnosnim podacima.

Branko Dokić naglasio je da Agencija mora biti otvorena, dok je CIPS zatvoren projekat, s obzirom da ima najviši nivo zaštite tajnosti podataka. Istakao je da je usvajanje Zakona jedan od uslova prihvatanja Sporazuma o stabilizaciji i pridruživanju.

U raspravi o principima Zakona učestvovali su svi prisutni članovi Komisije, a nakon rasprave pristupilo se galasanju o principima.

Komisija je jednoglasno podržala principe Prijedloga zakona o Agenciji za informaciono društvo Bosne i Hercegovine.

Nakon toga, predsjedavajući je istakao da su na predloženi zakon amandmane uložili poslanici: Momčilo Novaković, Adem Huskić i Miloš Jovanović, te otvorio raspravu o amandmanima, kako slijedi:

AMANDMAN 1. (MILOŠ JOVANOVIĆ)

U stavu (1) člana 3., iza riječi "Agencija je" briše se riječ "samostalna", a iza riječi "organizacija" dodaju se riječi: "u sastavu Ministarstva komunikacija i prometa", a ostali tekst ostaje isti.

Amandman nije usvojen.

AMANDMAN 2. (ADEM HUSKIĆ)

U članu 3. stav (3) riječi :

"Ministarstvo komunikacija i prometa Bosne i Hercegovine " zamjenjuju se riječima: "Ministarstvo civilnih poslova Bosne i Hercegovine".

Amandman nije usvojen.

AMANDMAN 3. (MILOŠ JOVANOVIĆ)

Iza člana 3. dodaje se novi član 3a), koji glasi: "Sjedište Agencije je u Banjoj Luci."

Amandman nije usvojen.

AMANDMAN 4. (MILOŠ JOVANOVIĆ)

U stavu (1) člana 8. , iza riječi "uprave, " dodaju se riječi: "upravnim organizacijama, a tekst u nastavku rečenice ostaje isti.

Amandman je jednoglasno usvojen.

AMANDMAN 5. (MILOŠ JOVANOVIĆ)

U stavu (1) člana 8. , brišu se tačke j) i l).

Amandman nije usvojen.

AMANDMAN 6. (MILOŠ JOVANOVIĆ)

U stavu (6) člana 8., na početku prve rečenice, iza riječi "Agencija" brišu se riječi: "na zahtjev nadležnih ministarstava".

U istom stavu (6) člana 8. briše se druga rečenica u cijelosti.

Amandman nije usvojen.

AMANDMAN 7. (MILOŠ JOVANOVIĆ)

U stavu (7) člana 8., riječ "produkcije" zamjenjuje se riječju "izrade", a iza riječi personalizacije stavlja se tačka i briše se tekst „i distribucije, i to:“ , kao i tačke od a) do p) u cijelosti.

Amandman je jednoglasno usvojen.

AMANDMAN 8. (MILOŠ JOVANOVIĆ)

U stavu (1) člana 9. briše se posljednja rečenica u cijelosti, a ostali tekst ostaje isti.

Amandman je jednoglasno usvojen.

AMANDMAN 9. (MOMČILO NOVAKOVIĆ)

U stavu (2) člana 12. , ispred riječi "Ministarstva", dodaju se riječi: "Vijeća Agencije i", a ostali tekst ostaje isti.

Amandman je jednoglasno usvojen.

AMANDMAN 10. (MOMČILO NOVAKOVIĆ)

Iza člana 12. dodaje se novi član 12a), koji glasi:

"(1) Agencija ima Vijeće, koje vodi Agenciju u pogledu strateških pitanja implementacije zakona, te vrši konsultacije s direktorom i prima od njega izvještaje. Vijeće Agencije usvaja kodeks rada Agencije. Osim toga, Vijeće Agencije ima funkciju apelacionog tijela za odluke koje donosi direktor.

- (2) Vijeće Agencije sastoji se od sedam članova koji se imenuju na osnovu ličnih sposobnosti kao pojedinci koji imaju pravno, ekonomsko, tehničko ili drugo relevantno iskustvo i stručnjaci su u oblasti IKT. Vijeće Agencije čine po dva člana iz reda konstitutivnih naroda i jedan član iz reda ostalih.
- (3) Članovi Vijeća Agencije imenuju se na period od četiri godine i mogu biti ponovo imenovani samo na još jedan mandat. Članovi Vijeća Agencije biraju predsjedavajućeg iz svojih redova. Vijeće Agencije sastaje se najmanje četiri puta godišnje.
- (4) Direktor Agencije, njegov zamjenik i predsjednik Vijeća Agencije moraju biti iz reda različitih konstitutivnih naroda.
- (5) Direktor Agencije podnosi izvještaj Vijeću Agencije o strateškim pitanjima rada Agencije. Direktor Agencije prisustvuje svim sastancima Vijeća Agencije bez prava glasa.
- (6) Članove Vijeća Agencije imenuje Parlamentarna skupština BiH, na prijedlog Vijeća ministara BiH, na osnovu liste kandidata koju je nakon provedene procedure javnog konkursa utvrdilo Ministarstvo, koja će sadržavati dvostruko više kandidata od raspoloživih mjesta.
- (7) Parlamentarna skupština BiH prihvata ili odbacuje predložene kandidate u roku od 30 dana nakon podnošenja prijedloga. Ako Parlamentarna skupština BiH odbaci prijedlog, Vijeće ministara BiH predlaže drugorangirano lice s liste kandidata koju je utvrdilo Ministarstvo i podnosi taj prijedlog Parlamentarnoj skupštini BiH.
- (8) Zvaničnici na zakonodavnim ili izvršnim funkcijama na svakom nivou vlasti, ili članovi tijela političkih stranaka ne mogu se kandidirati za članstvo u Vijeću Agencije.
- (9) Članovi Vijeća Agencije moraju prijaviti svaki interes koji imaju u djelokrugu rada Agencije i izuzimaju se u slučajevima koji predstavljaju sukob interesa."

Amandman je jednoglasno usvojen.

AMANDMAN 11. (MILOŠ JOVANOVIĆ)

U tački b) člana 16. , riječi "razvoja informacionog društva;" zamjenjuju se riječima: "IKT";. U tački c) člana 16., iza riječi "poslovima" stavlja se tačka a preostali tekst ove tačke briše se.

Amandman je jednoglasno usvojen.

AMANDMAN 12. (MOMČILO NOVAKOVIĆ)

U tač. c) i d) člana 18., ispred riječi „Ministarstva“ dodaju se riječi „Vijeća Agencije i“, a ostali tekst ostaje isti.

U tački g) člana 18. briše se tačka i dodaju se riječi „ Vijeća Agencije i Ministarstva.“

Amandman je jednoglasno usvojen.

AMANDMAN 13. (MILOŠ JOVANOVIĆ)

U članu 24. mijenja se naslov i glasi:
„(Eksterna ocjena rada Agencije)“.

U stavu (1) člana 24. , iza riječi „Agencija“ riječi: „dužni su da:“ zamjenjuju se riječima: „će s ciljem osiguranja kvaliteta rada Agencije postupati kako slijedi:“.

U tački a) stava (1) člana 24., riječi „bez odgađanja“ zamjenjuju se riječju „pravovremeno“ , a ostali tekst ostaje isti.

Amandman je jednoglasno usvojen.

AMANDMAN 14. (MOMČILO NOVAKOVIĆ)

U stavu (1) člana 25., ispred riječi „nevladinih organizacija“ dodaju se riječi: „entitetskih i institucija Brčko Distrikta,“ a ostali tekst ostaje isti.

Amandman je jednoglasno usvojen.

AMANDMAN 15. (MOMČILO NOVAKOVIĆ)

Stav (2) člana 26. briše se.

Amandman je jednoglasno usvojen.

AMANDMAN 16. (MOMČILO NOVAKOVIĆ)

U stavu (2) člana 27., ispred riječi „Ministarstva“ dodaju se riječi „Vijeća Agencije i“ a ostali tekst ostaje isti.

Amandman je jednoglasno usvojen.

Prilikom rasprave o posljednjem 17. amandmanu poslanika Momčila Novakovića, kojim se briše član 28., na traženje članova Komisije da se izjasni o amandmanu, ministar Dokić odgovorio je da je član 28. ključan za cijeli zakon i da bi usvajanjem predloženog amandmana došlo do velike promjene u Zakonu, jer bi CIPS u tom slučaju bio izvan Agencije za informaciono društvo BiH, te da mora izvršiti dodatne konsultacije u Vijeću ministara BiH. Na prijedlog predjedavajućeg, Komisija je jednoglasno odlučila da se prekine daljnja rasprava o navedenom amandmanu i usvojila zaključak da se traži mišljenje Vijeća ministara BiH o amandmanu na član 28. Prijedloga zakona o Agenciji za informaciono društvo BiH.

Komisija je jednoglasno zaključila da se od Kolegija Doma traži odobrenje za produženje roka od 10 dana za podnošenje amandmana na Prijedlog zakona o Agenciji za informaciono društvo Bosne i Hercegovine.

Ad. 3.

Predjedavajući je podsjetio na rasprave koje su vođene u Komisiji o ulozi nezavisnog člana Upravnog odbora Nezavisnog operatera sistema za prijenosni sistem u BiH i njegovu posebnu ulogu, te pozvao predstavnicu Ministarstva vanjske trgovine BiH da obrazloži stav Ministarstva.

Biljana Trivunović istakla je da je u 2004.godini usvojen Zakon o elektroprijenosu BiH i Zakon o osnivanju Nezavisnog operatera sistema za prijenosni sistem u BiH, te da se ove dvije kompanije osnivaju iz tri elektroprivrede, a da članove Upravnog odbora predlažu vlade entiteta i potvrđuje Vijeće ministara BiH. Navela je da je 13.februara 2005. za nezavisnog člana imenovan Simon Buckhnall i da je preuzeo sva ovlaštenja koje mu daje Zakon o osnivanju Nezavisnog operatera sistema za prijenosni sistem u BiH, a da je Upravni odbor imenovan 12. aprila 2005. S obzirom da je osnovan Nezavisni operater i da su mnoge ključne odluke već donesene, smatra da je opravdano mišljenje Ministarstva da u procesu uspostave NOS-a nije bilo narušavanje člana 47. Zakona o osnivanju NOS-a.

Na prijedlog predsjedavajućeg, Komisija je jednoglasno prihvatila mišljenje Ministarstva, te utvrdila da je prema standardima tumačenja pravne norme jasan član 47. Zakona o osnivanju nezavisnog operatera sistema za prijenosni sistem u Bosni i Hercegovini (“Službeni glasnik BiH”, br. 35/04) i da nije potrebno davati autentično tumačenje.

Ad. 4.

Predsjedavajući je obavijestio prisutne da su se on i zamjenici predsjedavajućeg Komisije sastali 11.oktobra s ministrom Dokićem i njegovim saradnicima, gdje se razgovaralo o primjeni Protokola bodovanja za CEMT dozvole i načinu izdavanja dozvola, te je tom prilikom konstatirano da je bilo određenih propusta prilikom izdavanja dozvola, kao i da je nakon sastanka dostavljen cjelovit izvještaj Ministarstva o raspodjeli CEMT dozvola.

Nakon kraće rasprave, Komisija je jednoglasno usvojila izvještaj Ministarstva komunikacija i prometa u vezi s izdavanjem CEMT dozvola, kao i sljedeće zaključke:

1. Traži se od Ministarstva komunikacija i prometa BiH da dostavi Komisiji do kraja januara 2006. izvještaj o dodjeli CEMT dozvola za 2006. i da kvartalno u 2006.godini dostavlja izvještaje o dodijeljenim CEMT i bilateralnim dozvolama.
2. Traži se od Ministarstva komunikacija i prometa BiH da dostavi Komisiji plan razvoja putne mreže u Bosni i Hercegovini.

Sjednica Komisije završena je u 16,15 sati.

PRIVREMENI SEKRETAR KOMISIJE
Ahmed Jalovičić

PREDSJEDAVAJUĆI KOMISIJE
Miloš Jovanović